

Kinguaassiuutitigut atonerluisoqarsimatillugu ilaqutariiteqqugaasutataatsimoortillugit avissaartuutsinnagit piffinni katsorsaqtigiittalernissaat anguniarluguqanoq illiuseqartoqarsinnaanera pillugu apeqquteqaat aallaavigalugu inatsisartunut oqallisissiaq.
(Inatsisartuni Siumup gruppiani ilaasortat)

Siumut siunnersuutaannut qujavugut, imatullu oqaaseqarfigissavarput.

Inuiaqatigiit ineriartoqqinnissaannut siuariartornissaannullu atugarissaarneq tunngaviussaaq. Inuiaqatigiit atugarissaarnikkut nukittuumik inissisimasut ilaqutariit tunngavissaraat ikiorneqarnissamillu pisariaqaritsisut ikiorneqarnissaat qulakkeertariaqarluni. Inuiaqatigiit atugarissaarnerat pitsaasoq tassaavoq peqqinnissamut ilinniarnissamut suliffeqarnissamullu atugarisatigut periarfissaqarneq, sumi inissisimaneq apeqqutaatinnagu.

Siumut isumaqarpoq innuttaaqataasoq kinaluunniit pisussaafeqartoq ilaquttaminut, qanigisaminut nunaqqatiminullu inooqataanermini timikkut tarnikkullu inuunerup atoruminartuunissaanut suleqataanikkut akisussaaqataassalluni.

Siunnersuutip imarisaa maani inersuarmi tamavitta ataatsimoorfigalugulu tapersorsoripput qularutissaanngilaq. Inuiaqatigiit ukiuni nunatta iluani oqaluttuarisaanitsinni allanngorarfiusumi assigiinngitsorpassuarnik kinguaariinniit kinguaariinnut nalaataqarsimanitta suliassaqtartippatigut, tamanna ataatsimoorfigalugu alloriaqatigiiffiniarlugu kattukkutta kivissinnaasarpassuaqarpugut. Naak ilaatigut nikallornartut, assoroornartut ilaatigullu ilungersuummernartut takkuttaraluartut atukkat pitsanngorsarnissaannut ujartueqatigiittariaqarpugut, PINGAARTUMIK ilaqutariit nukittuut pilersinnissaannut.

Kinguaassiuutitigut atonerluineq naaggaarlunnarparput. Inuk kinaagaluartoq naleqartutut ataqqinartutullu isigalugu isiginnittaaseqartariaqarpugut. Qularutissaanngillunnarporlu inuit kinguaassiuutitigut atonerluisut tassaasinnaasut nammineq meeraanermanni atonerlugaasimasut, imaluunniit ilaqutariittut pingaartitat naleqartitallu pillugit amigaateqarsimasut. Kialluunniit meeraa illersugassaraarput, taamaattumik meeraq atonerlunneqarsimalluni oqarpat pimoorussamik suliniutitut isigalugu ikiorneqartariaqarpoq. Ajoraluartumik sumiluunniit inoqartuarpoq innimisussinnaanngitsunik, sanilip misigissutsikkut timikkullu annersitsinissaanut qanorluunniit misigitinnissaanut qajassuussinnaanngitsunik. Tamanna allanngortinneqassappat susassareqatigiinnerup aqqani oqaloqatigiinneq piorsarsimassusermillu aallussineq annertusarneqartuaannarli.

Ilaqutariittut inuuneq nalitoqaaq, allanut sanilliuutissallugu assersuukkuminaaqaq. Kinguaassiuutitigullu atonerluisoqartillugu pisortat sukkanerpaamik akuleruttarnissaat pillugu sulisoqarnikkut annertusaasoqartuarli. Imminut akilersinnaassuseq tassaniimmat. Soorunami ineriartortitsiumalluta sutigut tamatigut inuussutissarsiorneq annertusarnissaa pingaartutut isiguassavarput. Uaniami pingaarnerpaaq tassaammat inuk. Inuk kinguaassiuutitigut kanngutsaatsuliorfigineqarsimappat ilaqutariit

ataatsimoortinneqarlik katsorsarlugillu. Naalakkersuisut akissuteqaamminni ersersippaat sulisussaqaarniarnikkut unamminartut arlaqartut, tamanna ilisimavarput. Taamaattorli isumaqarpugut piomassuseqarfigivillugu anguniagaq pimoorukkaanni aporfiiit putoqquffigissallugit periarfissaqartuaannartoq. Nalunngilarput ullutsinni aningaasat qanoq inuiaqatigiinni naleqartitsigigigut, taamaattoq inulerisoqarnerput annertusarniarlugu pitsanngorsaatisat ukkanneqarat annertuneruli. Inuit nukissallit tunniussaqaarusuttullu tamaasa pisariaqartippagut.

Assersuutigalugu ullualunnguit matuma siornatigut DR2 Tasiilaq pillugu aallakaatitassiaa, qamuuna annertugut amerlagunaqaagut. Ilumoortortaqaqput aammali eqqaamasariaqarparput suut tamaasa taartuinnartut qalipaasersussannginnatsigit. Nassuerutigisariaqarparpulli nunatsinni sumiiffinni amerlaqisuni ajornartorsiutit tamakku takussaammata. Qatserinerinnakkut iluarsinaviangillat sorlaa tikillugu iliuusissat susassaqaqtunit tamanit ataatsimoorfiunngippata.

Perorsaaneq maligassiuinerlu pitsaasumik sukataarullugu pimoorutinnikkutsigu katakkaluttuinnagassagut amerlassaqaat. Taamaattumik suliniutit maannakkut ingerlasut iluatigalugit annertusarneqaqqinnissaat pilertornerusumik suliniutigigit. Pisortat akisussaaffik kisiat kivissinnaanngilaat, inuiaqatigiinnut tasionermik taallugu kivitseqatigiinnissaq suaarutigisariaqarparput. Akisussaaffimmi tamatsinniimmat, ilinni uannilu.

Naalakkersuisut suliniutit maannakkut ingerlanneqartut suliaat pillugit nersualaartariaqarpagut, taamaattorli inuit nukissallit ilanngullugit kaammattortuartigit nikalloqqunagit, allanillu ilassarsiortuarta amerlaneruguttami tamatsinnut oqinnerusussaammat. Kinguaassiutitigut kannguttaattuliorneq pillugu ilaqutariit avissaartinnissaat aaqqiinertut taaneqarsinnaanngilaq, taamaattumik ilaqutariit nukittuut pilersinniarlugit ataatsimoortumik katsorsaaneq salliutinneqarli. Nalunngilarput inuiaasugut nukittuut, nallinnartutut isiginata sorsussuseqarsinnaasutullu isiginissarput nukittorsartuaannartariaqarparput. Aporfissatut eqqarsarfiguakkagut akimmiffittut isiguassagutsigit alloriangaarnaviannngilagut. Aporfittut isigisagut ajugaaffigisinnaasutut isigisigit, taava angusaqarnerulluta nikussaarsinnaalerumaarpugut.

Qujanaq.